

Morning Dogri (NSD) National News Bulletin 03-02-2025

- दिल्ली विधानसभा चुनावों लेई प्रचार दा अज्ज खीरी ध्याड़ा ऐ। सब्बै पार्टियां मते शा मते मतदाताएं गी अपने पक्खै च करने लेई इक दुए दी नुख्ताचीनी बी करै करदे न। मतदान बुधवारे होग।
- वक्फ संशोधन बिल-2024 लेई गठत संयुक्त संसदीय कमेटी दी रिपोर्ट अज्ज लोकसभा च पेश कीती जाग।
- प्रयागराज च त्रीया अमृत स्नान जारी ऐ। 13 जनवरी गी शुरू होए दे महाकुंभ दरान अजें तोड़ी 35 करोड़ कोला मते श्रद्धालु स्नान च चलोबी लाई चुके दे न।
- उपराष्ट्रपति जगदीप धनखड़ होरें आखेआ ऐ जे लक्खें दी तदाद च गैर कनूनी तौरा पर आई बसे दे प्रवासिएं गी देसै च नेई रखेआ जाई सकदा।
- भारतीय ग्रैंड मास्टर आर. प्रज्ञान नंदा नै टाटा स्टील मास्टर्स 2025 दा खताब जित्ती लैता ऐ।
- टी-20 च भारत नै कल इंग्लैंड गी 150 रंजें कन्नै हराइयै श्रृंखला 4-1 कन्नै जित्ती लैती ऐ।

<><><><><><>

Delhi Campaign

दिल्ली च विधानसभा चुनाव आस्तै प्रचार दा अज्ज खीरी ध्याड़ा ऐ। सब्बनं राजनीतिक दल मतदाताएं गी लुभाने दे जतनें च जुड़े दे न। आम आदमी पार्टी, भारतीय जनता पार्टी ते कांग्रेस पार्टी अपने अपने उम्मीदवारें आस्तै समर्थन जुटाने दी कोशिश च इक दे मगरा इक रैलियां ते रोड़-शो करा र दे न। भारतीय जनता पार्टी दे वरिष्ठ नेता ते प्रधानमंत्री नरेन्द्र मोदी होरें अज्ज दपैहरी आर के पुरम च जनसभा गी संबोधित कीता। रैली दौरान प्रधानमंत्री होरें आरोप लाया जे आम आदमी पार्टी कुंठा सोयां ग्रस्त ऐ ते हर घंटे नमी नीतिये दी घोषणा करदी ऐ। उने आखेआ जे इस पार्टी नै पिछले 11 साल च छडा समें गै बरबाद कीता ऐ ते जनता आस्तै कोई विकास दा कम्म नेई कीता। आम आदमी पार्टी दे संयोजक अरविंद केजरीवाल होरें मुख्य निर्वाचन आयुक्त होरें गी चिड़ी लिखिए मंग कीती जे भारतीय जनता पार्टी दे कारजकरताएं ते दिल्ली पुलिस दे अधिकारिये खिलाफ कार्रवाई कीती जा। उने मीडिया कन्नै गल्ल बात च दावा कीता जे नमी दिल्ली विधानसभा क्षेत्र च भाजपा दे कार्यकर्ता उनदी पार्टी दे लोकें गी डरा, धमका ते परेशान करा रदे'न।

कांग्रेस अध्यक्ष मल्लिकार्जुन खरगे, पार्टी दे वरिष्ठ नेता राहुल गांधी ते प्रियंका गांधी भी राष्ट्रीय राजधानी च रैलियां करा र दे न। 70 सदस्ये आहली दिल्ली विधानसभा दे चुनाव आस्तै बुधवार गी वोट पाए जाने न। ते वोटें दी गिनतरी आहला कम्म महीने दी 8 तारीख गी होग।

<><><><><><>

JPC

वक्फ(संशोधन) बिल-2024 लेई गठत संयुक्त संसदीय कमेटी दी रिपोर्ट अज्ज लोकसभा च पेश कीती जाग। संयुक्त संसदीय कमेटी दे चेयरमैन जगदम्बिका पाल ते बीजेपी दे सांसद संजय जयाववाल होर एह रिपोर्ट पेश करगन। ओह संयुक्त संसदीय कमेटी गी दित्ते गेदे सबूतें दा रिकार्ड बी सदन दे पटल पर रक्खगन। इस रिपोर्ट गी लोकसभा अध्यक्ष ओम बिरला होरें गी जंदे 30 जनवरी गी सौंपेआ गेआ हा। कमेटी नै वक्फ संशोधन बिल च संशोधन करियै मसौदा रिपोर्ट 29 जनवरी गी तैआर करी लैती ही। कमेटी च शामिल विपद्गी सदस्यें रिपोर्ट पर अपनी असैहमति व्यक्त कीती ही। एहदे शा पैहले कमेटी ते पक्फ बिल-1995 च 14 खंडे ते धाराएं अमेत 25 संशोधनें गी मंजूरी दित्ती ही।

<><><><><><>

VP-Illegal Migrants

उपराश्ट्रपति जगदीप धनखड़ होरें आखेआ ऐ जे लक्खें दी तदाद च आए दे गैर कनूनी विस्थापतें गी देश च नेई रखेआ जाई सकदा की जे एहदे कन्नै आबादी दा तबाजन गड़बड़ाई जंदा ऐ। उनें युवाएं दा आह्वान कीता जे ओह देश विरोधी प्रचार आली सोच गी खत्म करन। जगदीप धनखड़ जेहड़े के राज्यसभा दे चेयरमैन बी ऐन, होरें संसद च बार-बार बिघ्न पौने उप्पर बी चिंता जाहर कीती। उपराश्ट्रपति होरें एह गल्ल इंस्टीच्यूट ऑफ चार्टर एकाउंटस ऑफ इंडिया पास्सेआ आयोजित वर्ल्ड फोरम ऑफ एकाउंटस कांफ्रेंस च आक्खी। इस मौके पर अग्गे बोलदे होई उनें आखेआ जे युवाएं गी अस्तित्वगत चुनौतिएं आस्तै चिंता करनी लोड़चदी ऐ। उपराश्ट्रपति होरें चिंता जाहर करदे होई आखेआ जे किश लोक ते इकाइयां देश दी विकास यात्रा कन्नै खुशी मसूस नेई करा करदे न। धनखड़ होरें आखेआ जे सनसनी ते दुष्प्रचार फैलाना उंदी प्रवृत्ति बनी गेदी ऐ।

<><><><><><>

Mahakumbh

प्रयागराज च त्रीया अमृत स्नान जारी ऐ। एह स्नान महाकुंभ मेले दा सब्बने थमां मता महत्वपूर्ण ते पवित्र अनुष्ठान ऐ। एह्दे थमां पैहले 2 अमृत स्नान 14 जनवरी मकर सक्रांति आले ध्याड़े ते 29 जनवरी मौली अमावस्या आले रोज होए हे। अमृत स्नान दे सरबंघै च सुरक्षा दे पुख्ता बंदोबस्त करने लेई नीम फौजी बलें सनें 50 ज्हार थमां मते पुलसकर्मिएं गी तैनात कीता गेदा ऐ। उत्तर प्रदेश सरकार नै इक मजबूत सुरक्षा योजना लागू कीती ऐ ते महाकुंभ दे मेला क्षेत्र गी “नो व्हीकल ते नो वी.आई.पी जोन घोषत कीता गेआ ऐ। महाकुंभ 13 जनवरी गी शुरू होआ हा ते अजे तगर 35 करोड़ थमां मते श्रद्धालु संगम च डुबकी लाई चुके दे न।

<><><><><><>

Supreme Court Mahakumbh

सुप्रीम कोर्ट च कल इक याचिका पर सुनवाई होग जिसदे च महाकुंभ च हिस्सा लैने आहले श्रद्धालुएं दी सुरक्षा यकीनी करने आस्तै विशेष दिशा-निर्देश ते नियम लागू करने दी मंग कीती गई ऐ। महाकुंभ च पिच्छले बुधवार गी भगदड़ च घट्टोघट्ट 30 लोक मारे गए हे ते 60 लोक घायल होई गए हे। सुप्रीम कोर्ट दी वेबसाइट पर जारी सूची च मुख्य न्यायाधीश संजीव खन्ना ते न्यायमूर्ति संजय कुमार हुन्दी पीठ इसदे कन्नै सरबंधित जनहित याचिका दी सुनवाई करौंग। याचिका च भगदड़ दी घटनाएं गी रोकने ते संविधान दी दफा 21 तैहत समानता ते जीवन दे मौलिक अधिकारें दे संरक्षण दी मंग कीती गई ऐ। इस याचिका च राज्यें गी एह निर्देश देने दी बी मंग कीती गई ऐ जे ओह प्रयागराज च अपने अपने सुविधा केंद्र स्थापित करन ते आपात स्थिति च अपने अपने राज्यें दे नागरिकों दी सुरक्षा संबंधी जानकारी उपलब्ध करान ते सहायता करन। याचिका च महत्वपूर्ण व्यक्तियों दी आवा-जाही दे नियम बनाने ते आम लोकें दी सुरक्षा गी तरजीह देने दी मंग कीती गई ऐ।

<><><><><><>

Chess

शतरंज च भारतीय ग्रैंड मास्टर आर.प्रज्ञान नंदा नै लीडरलैंड दे विज्क आन जी गी इक दिलचस्प ट्राई ब्रेकर च हराइयै टाटा स्टील मास्टर्स 2025 दा खताब अपने नां करी लैता ऐ। इस जित्ते दे कन्नै गै आर.प्रज्ञान नंदा 2006 च विश्वनाथन आनंद दे बाद एह प्रतिष्ठित खताब जित्तने आले पैहले भारतीय बनी गे न। 14 खडारिएं दा राउंड रोबिन इवेंट बड़ा दिलचस्प ते नाटकीय रेआ।

गुकेश ते प्रज्ञान दवै 13 राउंड दे बाद 8.5 अंकें कन्नै बरोबरी पर रेह। पूरी टूर्नामेंट च इक बारी बी नेई होरने आले गुकेश अपनी खीरी गेम ग्रैंड मास्टर अर्जुन एरिगैसी कोला हारी गे।

<><><><><><>

Men T-20

भारत नै टी-20 क्रिकेट च कल रातीं श्रृंखला दे 5में ते खीरी मैच च इंग्लैंड गी 150 रंजें कन्नै हराइयै 5एं मैचें दी श्रृंखला 4-1 कन्नै जित्ती लैती ऐ। मुंबई दे वानखेडे स्टेडियम च भारत नै 248 रंजें दे लक्ष्य परैंत च इंग्लैंड दी पूरी टीम 10 ओवर ते 3 गेंदे च छड़े 97 रंज गै बनाई सकी। ओहदे सलामी बल्लेबाज फिलिप साल्ट नै सब्बने थमां मते 55 रंज बनाए। भारत दे मोहम्मद शमी नै 3 विकेटां हासल कीतियां जिसलै जे वरुण चक्रवर्ती, शिवम दूबे ते अभिषेक शर्मा नै 2-2 ते रवि बिश्नोई नै इंग्लैंड दा इक खडारी आउट कीता। एहदे शा पैहले बल्लेबाजी करदे होई भारती टीम नै 20 ओवरें च 9 विकेटां मोआइयै 247 रंज बनाए हे।

<><><><><><>

ISRO

भारतीय अंतरिक्ष अनुसंधान संगठन इसरो नै आखेआ ऐ जे एनवीएस-02 अंतरिक्ष यान पर लग्गे दा ऐ, थ्रस्टस दे नकाम रौहने कारण उपग्रैह गी लोड़चदी कक्षा च स्थापत करने दे जतने गी पछाड़ लग्गी ऐ। इस उपग्रैह गी जीएसएलवी-एमके-2 राकेट दी मदद कन्नै श्री हरि कोटा दे अंतरिक्ष केन्द्र थमां 29 जनवरी गी प्रक्षेपित कीता गेआ हा जेहड़ा जे अंतरिक्ष नेविगेशन सिस्टम साब्वै बड़ा महत्वपूर्ण ते इसरो दा 100मां प्रक्षेपण हा। इसरो नै उआं आखेआ ऐ जे उपग्रैह दा सारा सिस्टम ठीक ठाक ऐ ते उपग्रैह जीटीओ आर्बिट च चक्कर ला करदा ऐ ते इस कक्षा च नेविगेशन लेई उपग्रैह दा इस्तेमाल करने लेई वैकल्पिक मिशन रणनीतिएं पर कम्म कीता जा करदा ऐ।

<><><><><><>